

1. HABENARIA TRIFIDA. †

H. caule paucifloro; foliis lanceolato-oblongis; foliolis calycinis tribus interioribus trifidis. *Crescit locis temperatis, opacatis Regni Novogranatensis inter villam San Miguel et convallem Guachicon prope Almaguer, alt. 810 hex. ☿ Floret Novembri.*

RADIX tuberosa; tubere solitario, oblongo. CAULIS erectus, sesquipedalis, teres, glaber, simplex, pauciflorus. FOLIA lanceolato-oblonga, acuta, carinata, basi vaginantia, striato-nervosa, glabra, sesquipollicaria. FLORES solitarii, pedicellati. CALYX glaber; foliola tria exteriora subæqualia, patentia, ovata, acuta, concava, striata, albo-virescentia, quinque lineas longa; duo interiora lateralia trifida, alba, exterioribus paullo longiora; laciniis linearibus, obtusis, inferiore a superioribus approximatis divergente; foliolum sextum (labellum) reliquis paullo longius, album, trifidum, basi calcaratum; laciniis linearibus, approximatis; calcare tubuloso, apice emarginato et bituberculato, bipollicari, pendulo, glabro. OVARIUM costatum, glabrum, semipollicare et longius. GYNOSTEMUM breve, carnosum. STIGMA magnum, quinquangulare, angulis duobus inferioribus incrassatis, inflexo-approximatis. ANTHERÆ loculis discretis, longitudinaliter adnatis. POLLINIS granulosi massæ pedicellatæ; pedicelli insidentes operculis antheræ cuculliformibus. CAPSULA oblonga, sexstriata, glabra.